

HEADLINES (EVENING)

1. Sorkar laipuiin GST a siamthatna chu Mizoram pawhin a hlawkpui a beiseiawm tih mithiamte'n an sawi.
2. Khawzawl-a loneitu Pu C. Lalchawimawia chu IIHR Innovative Farmer Award 2025 hlan a ni.
3. Vice President thar thlang turin vawiin khan Parliament ah tluang taka vote thlak a
4. Prime Minister Narendra Modia chuan vawiin khan Punjab-a tuilian tuarte dinhmun enfiahin Gurdaspur a tlawh.

<><><>

GST

Sorkar laipuiin GST a siamthatna chu Mizoram pawhin a hlawkpui a beiseiawm tih mithiamte'n an sawi. Akahhvani Aizawl zawhna chhangin, Ministry of Foreign Affairs (MOFA), TAIWAN, Soochow University-a Fellow, Post Doctoral Research, Dr. F.Lalramhluni chuan Sorkar laipuiin GST a siamthatna, GST Reform 2025-ah hian a hmaa GST rate chi 4 ni thin kha chi 2-ah chauh siam a ni a ti a, GST a nawlpuia a tlakhniam avangin thil man a tlawm dawn a, thil man a tlawm chuan pawisa hman a awl dawn a, pawisa hman a tam chuan thil siamchhuaktute a tiphur dawn a ni a ti a, thil siamchhuah thar a tam chuan ram sum leh pai dinhmun a ti thang dawn tih sawiin, Mizoramah pawh GST siamthatna chu hlawkpui a beiseiawm a tih thu a sawi a, Mizoram chuan thil siamchhuah nei tam lo mahse state dang atangin bungrua lakluh a tam a, GST rate a hniam chuan tunhma aiin bungraw lakluh a tam ang a, chuta GST an pek chuan state sorkar sum a ti pung zel dawn tih a sawi bawk a ni.

Dr Lalramhluni chuan GST rate tharah bungraw chi hrang hrang 357-a ah chhiah tihtlem a ni a ti a, GST rate tlakhniam avanga thil man tlawm langsar zual zingah lirthei te chi, lirthei ke hnih nei te, TV, air conditioner, damdawi te a ni a ti. Hetihruah hian bungraw thenkhat GST rate zaa zela 40 lawiha a tih pun te a awm ve thung a, GST rate tih pun avanga thil man to tur langsar zingah vaihhlo leh a kaihhnawih meizial, pan masala leh pawisa khelhna casino te a ni a ti.

<><><>

PM VISIT PREPAREDNESS

Prime Minister Pu Narendra Modi-a'n tun kar Inrinni-a Mizoram a rawn tlawh hunah VVIP chet velnaah harsatna a thlen loh nan mipuite chu lirtheia veivak tam lo tur leh kawngpui dungahte lirthei leh bungruate dah lo turin Traffic lam thuneituten an ngen.

Kolasib District Magistrate Pu Robert C. Lalmangaiha pawhin vawiin khan thuchhuah siamin, Kolasib District huam chhung Bairabi leh Mualkhang inkara Rel kawng chu tunkar inrinni hian Prime Minister Pu Narendra Modi-a'n a hawn dawn avangin, hemi atan hian mipuite him tlanna tur leh harsatna leh buaina a thlen lohna turin rel tlan laia luh leh chhuah, Rel chhunga buaina siam leh ruk ruk, hmeichhe zahawmna tihbawrhban leh mi dangte tana harsatna siamna lam chi reng reng phal a ni lo a ti a, Rel tlan laia Rel kawng acquired area huam chhungah tawhsual tawh theihna chi reng reng leh Rel tlan tibuai thei lam chi bungrua, hnawm-hnawk, hmanrua leh ran vulhte khuahkhirha, hetiang a lo tibuai thei chi reng reng lakah inthiar fihlim tur leh ni tin Rel a lo tlan dawn tak avangin hnam leh hnam, chi leh chi lam hawi thil buaina engmah siam loh turin a hriattir a. Hei hi India danpui kalh tlat a nih avangin mipuite fimkhur tur leh harsatna siam lui an awm chuan an phu tawh hremna Dan anga pek an nih tur thu a sawi a ni.

<><><>

FARMER AWARD

Khawzawl-a loneitu Pu C. Lalchawimawia chuan IIHR Innovative Farmer Award 2025 hlan a ni. Vawiin khan Bengaluru-a ICAR-Indian Institute of Horticultural Research hmuna Dr. G.S. Randhawa Auditorium – ah Pu C.Lalchawimawia, Rabung khua chuan IIHR Innovative Farmer Award-2025 a dawng.

Pu C. Lalchawimawia hian Tomato Arka Abhed variety chu offseason ah Rabung khuaa Phunchawng zau heactare 0.6 -a zauah chingin cheng nuai 7 sing 5 a lei chhuak a, hei hian miteah hnathawkin, mi tam zawkin Tomato chinga hmalak tumin an bei mek a ni. Pu C. Lalchawimawia hian Indian Institute of Horticultural Research technology theh darh

kawngah leh midang tihhmuh kawngah a tih that em avanga he award hi dawng a ni a, Khawzawl District atanga ICAR-IIHR te'n Award an pek 4-na a ni a, he Award dawng tur hian hmarchhak state atangin mi 2 an thlang chhuak a ni. Pu C Lalchawimawia kan corr in a biakna lo ngaithla ang.

Indian Institute of Horticultural Research – ICAR hian Pu C. Lalchawimawia bakah hian Khawzawl district chhunga kuthnathawktu te hnenah Award a lo hlan tawh a, chungte chu –

- * Pu TC. Lalliantluanga, Tualte – Best Farmer Award (2020)
- * Pu Lalsangzuala, Tualte – Best Farmer Award (2022)
- * N.B.Sanga Changte, Rabung - Best Farmer Award (2023) te an ni.

ICAR-Indian Institute of Horticultural Research hian Tomato chi hi KVK Khawzawl kal tlangin an pe chhuak thin a ni. Kumin hian kg 12 vel KVK Khawzawl kaltlangin kuthnathawktute hnenah sem chhuah leh a ni a. KVK chuan kuthnathawktute hnenah a chin dan leh enkawl dan an zirtir thin a, district chhunga kuthnathawktuten an hlawkpui hle niin an sawi a ni.

<><><>

AZL-CCPUR HELICOPTER

Aizawl leh Churachandpur inkara helicopter thlawhtir leh turin ruahmanna siam mek a ni. Chief Minister's Office atanga thu dawn danin, Mizoram sorkar chuan thenawm state Manipur-a cheng Mizote leh Zohnathlak dangte nena inlaichinna leh inkalpawhna tihmasawn turin Mizoram khawpui Aizawl leh Manipur-a Churachandpur inkara helicopter thlawhtir leh turin ruahmanna a siam mek a. Chief Minister Lalduhoma chuan Mizoram, Assam leh Manipur atanga Hmar Students' Association, HSA te nen an inhmuhkhawm tumin, a kaihhruai Mizoram sorkar chuan Aizawl leh Churachandpur inkara helicopter thlawhtir leh a nih tur thu hi a lo hriloh a, hei bakah hian inlaichinna tha lehzual a awm theihna turin Churachandpur-ah Mizoram House sak thuai a nih tur thu a hrilh bawk a ni.

Kum 2023 May ni 3-a Manipur tualchhung buaina nasa tak a chhuah hnuah Ministry of Home Affairs hmalakna hnuaih kum 2023 September ni 27 khan Churachandpur leh Aizawl inkar helicopter service a thlawk tan a, kum 2024 July ni 15 atangin chawlhkar khata vawi hnih thlawhtir tan leh a ni a, Helicopter service hi a bik takin Churachandpur district leh Manipur tlangrama chengte tan a tangkai hle a, hun engemawchen tih tawp a nih hnuah thlawh chhunzawm tir a ni leh dawn a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

GST

Prime Minister Narendra Modia'n kumin Independence Day lawmnah GST chhuan thar hman a nih tur thu a puang a. Hei hi tun thla ni 3 a GST Council thukhawm chuan a taka rawn ti puitlingin chhiah lak dan chhawng li ni thin chu chhawng hnihah tittlemin awlsam zawkin a rawn siam danglam a. GST zaa 5, 12, 18 leh 28 a lak thin chu zaa 5 leh 18 ah tihhniam a ni a. Mi naran leh mi nawlpuite tana hlawkna thlen thei tur berin he GST hi siamrem a ni.

GST thar hian ramchhungah lawm a hlawh hle a. Abik takin insakna lama eizawngte leh insa mekte tan a tha hle dawn niin kan correspondent chuan a sawi a. Insakna bungrua cement ah chhiah zaa 28 lak thin chu zaa 18 lak a ni tawh dawn a. Heng bakah hian marble,granite block leh brick-a chhiah lak thinte pawh zaa 12 atangin zaa 5 ah a tlahniam a. Hei vang hian heng lama eizawng leh insa mekte chuan GST thar hman tur hi lawmawm an tih thu Akashvani an hrilh a ni.

<><><>

PM MODI

Prime Minister Narendra Modia chuan vawiin khan Punjab-a tuilian tuarte dinhmun enfiahin Gurdaspur a tlawh a. Punjab Governor Gulab Chand Kataria, Punjab Agriculture and Farmers' Welfare Kuldeep Singh Dhaliwal leh Animal Husbandry Minister Gurmeet Singh Khuddian ten an lo dawngsawng a. Pu Modia hain tuilian tuarte chhawmdawl na pek dan a enpui bakah chhungkaw harsatna tawkte a hmu bawk a ni.